

Popis stanovništva je najvažniji statistički projekt jedne države. U Bosni i Hercegovini popis će se održati nakon 22 godine. S obzirom na dešavanja u posljednje dvije decenije, pored demografske, naučne i ekonomske važnosti popis će imati i ogromnu političku važnost. Još od pripremne faze prate ga različite specifičnosti i kontroverze koje zahtijevaju pravovremeno i tačno informiranje bh. građanstva o svim detaljima vezanim za samo održavanje popisa, kako bismo dobili što tačnije i relevantnije podatke.

Jedna od specifičnosti ovog popisa je i ta da će se Bošnjaci prvi put imati priliku izjašnjavati pod svojim povijesno autentičnim etničkim imenom – Bošnjaci. Bilo bi pravo čudo u BiH, da ovu mogućnost nisu pratile kontroverze i manipulacije. Zbog problema vezanih za ovo pitanje, posebno zbog mogućnosti da se Bošnjaci izjašnjavaju na isti način kao i na popisu iz 1991., pod imenom Musliman, reagiralo je i Udruženje ilmije Islamske zajednice u Bosni i Hercegovini koje je na svojoj godišnjoj skupštini usvojilo Rezoluciju u kojoj je sadržan i stav u kojem se ovo udruženje koje okuplja blizu dvije hiljade imama, muallima, vjeroučitelja, muderrisa i profesora protivi upotrebi religijskog termina musliman u nacionalnom, etničkom značenju i zloupotrebi u političke svrhe. Isti stav o ovom pitanju ima i Islamska zajednica u Bosni i Hercegovini. Pripadnost etničkoj grupi, ne smije biti uslovljena religijskom pripadnošću, jer nisu svi muslimani u Bosni i Hercegovini Bošnjaci, niti su svi Bošnjaci muslimani. Iz istih razloga određene bošnjačke institucije osnovale su Fondaciju *Popis 2013*, koja ima za cilj pružiti podršku odgovornim za provođenje popisa, te doprinijeti javnom informisanju građana o različitim aspektima predstojećeg popisa stanovništva u Bosni i Hercegovini. U ovom broju u rubrici Forum, donosimo tematski blok tekstova vezanih za Popis 2013, sa istim ciljem, da damo svoj doprinos, kako bi se tema Popisa što sveobuhvatnije obradila, i kako bi javnost bila potpunije informirana.

U ovom broju, kroz opširan intervju sa prof. dr. Adnanom Silajdžićem, upoznajemo se o važnom procesu reorganizacije i reformi studija na Fakultetu islamskih nauka u Sarajevu.

S obzirom da ovaj broj Muallima izlazi u blagoslovljenom mjesecu ramazanu, Redakcija Novog muallima je odlučila određeni broj tekstova posvetiti ramazanskim temama. Naši autori tražili su odgovore, ali i postavili pitanja koja se neminovno nameću, s obzirom na najvažnije aspekte provođenja ibadeta u ovom mjesecu. U ovom broju donosimo i druge tekstove koje preporučujemo Vašoj čitalačkoj pažnji.

Senada TAHIROVIĆ